

TENISA



Andres Gomez.

Andres Gomezek erretiratu egingo dela esan du

DONOSTIA

Andres Gomez tenislari ekuadortarrak tenisetik erretiratu egingo dela esan du. Bere helburu nagusia lortzeke esango dio agur tenisari; izan ere, inoiz ere ez du lortu bere herriarentzat domina olinpikorik. Bartzelonako Joko Olinpikoetan aukerarik izan zuen, baina azken uneko lesio batek eragotzi zion bere amets guztiak gauzatzea. Gstadt-eko (Suitza) torneoan lesionatu egin zen, orkatilan hain zuten.

32 urte ditu Andres Gomez ez-kerrak eta tenis munduan 23 eraman ditu. 80ko hamarkadaren erdialdera ATPko laugarren postuan egon zen kokaturik eta 1990. urtean, bere garaipenik sonatuen lortu zuen: Roland Garros-a. Joan den astean, Frantziako Irekiko antolatzaileek, torneoan parte hartzeko gonbitea luzatu zioten, baina tenislari ekuadortarrak ezetza eman zien. Orain, erakustaldietan baino ez duela jokatu esan du Gomezek, «eta Ekuadorreko tenislari gazteak entrenatzen ariko naiz».

PILOTA

Eugik gehiago itxaron beharko du zigortuko dutenentz jakiteko


Lehiaketa Batzordeak erabakitzeke zuen epea gaur amaitzen da

Lehiaketa Batzordeak Eugi zigortuko duenentz erabakitzeke Profesional Alorreko Batzordeak maiatzaren 12an Gasteizen izan zuen bileraren agiriak behar ditu, eta oraingoz ez ditu jaso atzo Jose Mari Salanueva bi batzordeetako kideak EGUNKARIARI azaldutakoaren arabera.

JUAN KRUIZ LAKASTA / IRUÑEA

Maiatzaren 12an arratsaldeko zazpi t'erdietan Gasteizen bildu zen Profesional Alorreko Batzordea. Bileraren horretan Eugi eta Tolosaren arteko manomanista norgehiagokan gertatutakoa aztertu zuten batzordekideek, eta azterketa horretan Patxi Eugi eta Leatxe bere botileroaren adierazpenen laguntza izan zuten. Bileraren horretan esandako guztia idatziz bildu zuen Pedro Uriarte Euskadiko Pilota Federazioko idazkariak, eta idatzitakoa berak eraman zuen horrekin agiria idatzi ahal izateko.

Jakina denez, Profesional Alorreko Batzordeak afera Lehiaketa Batzordearen esku uztea erabaki zuen, eta epaia plazaratzeko zortzi egun eman zizkion batzorde horri. Epe horrekin batera, ordea, ez zizkien agiriak eman, eta Lehiaketa Batzordekoak oraindik ere horien zain daude. Beraz, gaur epea bete bada ere, Lehiaketa Batzordeak ez du oraingoz erabakirik plazaratuko. Jose Mari Salanueva Nafarroako Federazioko lehendakari, Profesional Alorreko batzordekide eta Lehiaketa Batzor-



Eugiren afera argitzeko oraindik denbora gehiago beharko da. JOXE

deko buruak azaldutakoaren arabera, ezin da erabakirik hartu agiria irakurri gabe.

Jose Mari Salanuevak dagoneko Javier Caballero Martinez abokatu iruinsema izendatu du aholkulari lanetan aritu dadin, baina aholkuak emateko aurretik agiriak irakurri eta aztertu beharko ditu. «Abokatuak agiria irakurtzen duenean, eta aholkua emateko prest dagoenean deituko dugu Lehiaketa Batzordea». Agiria zergatik ez duen oraindik jaso ez daki Jose Mari Salanuevak. «Nik Espainiako Federazioko lehendakariari eskatu diot, eta baita Euskal Herriko Federaziokoari, baina oraindik ez dut jaso. Idazkariak eskuz idatzi zuen bertan esandakoa, garbian jarri beharko du idatzitakoa, eta agian

hortik dator atzerapena».

Agiria jaso bezain laster abokatuari emanen dio irakur dezan, eta jarraian Lehiaketa Batzordea deituko du. «Ni Gasteizko bileran egon nintzen, eta zer gertatu zen badakit, baina abokatuari ezin diot nire memorian oinarritua gertatutakoa kontatuko, berak agiria irakurri beharko du. Irakurtzen duenean azkarra izanen da gainontzekoa, telefonoz deituko ditut gainontzeko batzordekideak, eta abokatuaren aholkupean, eta gertatutakoa aztertu eta gero, gure epaia berehala plazaratuko dugu». Jakina denez Salanuevak ezezik, abokatuak, Asegarce enpresako ordezkari bat eta betiko enpresen beste ordezkari batek ere osatzen dute Lehiaketa Batzordea.

RUGBYA

Pelaezen omenez partidua Baionan

KOLDO ALDUNTZIN / DONOSTIA

Gales B eta Frantziako unibertsitariak ariko dira gaur Saint-Leon zelaian, arratsaldeko 20.00etan, Jean-Luc Pelaez jokalaririk ohiaren omenez. Britainiarrak bisitan dira Frantzian, eta bisitaldian hiru partidua jokatu dituzte. Gaur Baionan munduko unibertsitari mailako txapelduen aurka 20.00etan, igandean Daxen 23 urtez azpiko Côte Basqueren aurka eta hirugarrena 25 urtez azpiko Akitaniakoan aurka. Esan behar da, galestarrak 25 urtez azpiko gazteak direla. Frantziar selekzioan, Dongieu baionesa eta Beñat Dagerre miarritarra ariko dira hasieratik. Pari-

sen ari den Etxeto ere bertan izango da. Agian Doihamburu baionesak ere parte har lezake.

Jean-Luc Pelaezek selekzio honekin hartu zuen parte joan den udan, munduko txapela lortuz. Segidan Baionara heldu zen eta ligaren lehen faseko azken jardunaldiaren bezperan auto istripu larri baten ondorioz bizia galdu zuen.

GONZALEZ ERRUMANIAREN KONTRA Errumania eta Frantziak adiskidant-

tzazko partidua jokatu dute Bucaresten. Errumaniarentzat partidua ez da momentu onean heldu, arazo politikoak direla eta. Frantziarentzat ordea, interesa

badu, ekainean Hego Afrikara baitoaz eta jokalariek postua lortu nahiko dute. Jean-Michel Gonzalez kanbotarra izango da euskal ordezkari bakarra, eta gainontzeko finalerdietako taldeetan ari direnak ezik, hor izango dira titular guztiak. Errumanian, aipa genitzake Cojocariu (Baiona), Dumitras (Pabe) eta Lungu.

2. MAILAKO EUSKAL TALDEAK Final zortzirenetan parte hartu ondoren, lehen mailako B multzora zuzenean igotzeko aukera galdu zuten Iparaldeko euskal taldeek, baina datorren asteburuan izango dute beste aukera bat B multzotik 2.

mailara jaitsi nahi ez dutenen aurka hain zuten ere. Egia da oso zaila izango dela irabaztea, azken finean maila bat gorago aritu direlako. Hauexek dira neurketak: Hogetmau-Baigorri, Rieumes-Garazi eta La Voulte-Bokale.

Hegoaldean, Mungiak Valentziako Cauren kontra jokatu du Lehen Mailara igotzeko txartela. Astearte arratsaldean egin zen zozketa Espainiako Federazioan, eta bizkaitarrek nahiko zorte ona izan dute egutegiaren arabera. Lehen partidua datorren igandean jokatu dute Valentzian, eta hilaren 30ean Mungian. Garaile irteten denak Nazional mailan aritzeko aukera izango du datorren denboraldian.

LABURREAN

KASPAROVek 20 partida jokatu ditu Vukovarren alde

Gari Kasparov xakelari errusiarrak 20 partida jokatu ditu Zagreb-en Vukovar (Kroazia) herriaren alde. Balkanetako gerra dela eta, Vukovar herriak eraso askotxo jaso ditu serbiarren aldetik. Kasparov, dirua bildu nahian, 20 aukariren aurka ariko da eta «Kroaziako herriak sinpatia sortzen dit, baita independentzia lortzeko duen borroka ere» adierazi du ●

BENIDORM taldea krisi gorrian dago

Benidorm eskubaloit taldea krisi gorrian dago. Talde honek 23 urte daramatza Ohorezko Mailan —lehen Calpisa, Tecnisan edo Helados Alacant izenekin— eta une hautean arazo ekonomiko latzak ditu. Kirol egoera ere ez da oso ona, mailari eusteko promozioa jokatu beharko duelako, Eibarko Arrateren kontra hain zuten ere ●

CHRISTIE ekainaren 5ean agertuko da berriro

Bartzelonako Joko Olinpikoetan 100 metroetan urrezko domina irabazi zuen Lindford Christie britainiarra Portsmouth-en (Ingalaterra) agertuko da berriro ekainaren 5ean, aste batzuetan lesionaturik egon eta gero. Lesioa Portugalen zegoela izan zuen, bizkarrean hain zuten. Christiek datorren udan Carl Lewis estatubatuararen kontra korritzeko asmoa dauka eta ikusmin handia sortu da ●

ESPAINIA eta Portugal hurrengo kanporaketetan

Hego Afrikan izango da Munduko III. Rugby Txapelketa eta bertan parte hartzeko kanporaketak martxan dira. Espainia eta Portugaleko selekzioek txartela eskuratu dute 94ean Galesen jokatzeko. Bestalde, Espainiako Jubenil Mailako Txapelketan Kakaraldo taldea da lider partidua bat falta dela. Bostgarren jardunaldian euskal derbia izan genuen eta Kakaraldo 43-17 nagusitu zitzaion Irun-i ●